

**Date – 16/05/2026**

**Time - 7:30 -7:40 Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES (MORNING)**

1. Mizoram leh thenawm state Manipur inkalpawhna kawng NH 102B Package – 2 dan mek chu thuneituten Joint Action Committee ngenna tih hlawhtlin an tiam avangin kawng dan hi tawp san a ni.
2. I&PR Minister Pu B. Lalchhazova'n mipui tana thuthar dik leh rintlak zawk chhawpchuah anih theih nan chanchinbumite leh sawrkar thawhhona tha a pawimawh tih a sawi.
3. Prime Minister Narendra Modia chuan Strait of Hormuz-ah him lehtluang taka bungraw phurh tlang a duh thu a sawi
4. Iran Foreign Minister Abbas Araghchi chuan sipai chakna hmangin Iran buaina chinfelna tur kawng inhawng a awm lo a ti.

<><><>

**NH 102B BLOCKADE**

Mizoram leh thenawm state Manipur inkalpawhna kawng NH 102B Package – 2 dan mek chu thuneituten Joint Action Committee ngenna tih hlawhtlin an tiam avangin kawng dan hi tawp san a ni.

Joint Action Committee on NH 102B Ngopa hmalakna in kawng hi ni 14 tlai atang khan dan tan a ni a, kawng dan hma hian Total Bandh huaihawt niin thuneitute atanga thu lawmawm an hriatloh avangin kawng hi dan a ni a, khualzin tangkhang mi engemawzat an awm a ni.

Kawng dan avanga khualzin tangkhang hi Manipur lam atanga lokal leh Manipur a haw tur an ni tlangpui a, Akashvani News thudawn danin thuneituten Joint Action Committee beisei hrang hrang tih hlawhtlin an tiam a, inremna thuthlung mumal tak ziah anih avangin kawng dan chu tih tawp a ni.

Ngopa Joint Action Committee chuan kawng siamthat an phut nana Total Bandh an huaihawt leh Kawng an dan chhunga khawtlang thlawpna an dawng chu lawmawm antih thu sawiin kawng dan laia lirthei tangkhang leh khaihlak phah zawng zawng hriatthiamna an dil tih an sawi a ni.



## **CM AT KHAWZAWL**

Chief Minister Pu Lalduhawma'n khualzin hip nan leh dawnsawn nan Zo Nun Ze mawi lantir zel a tul thu a sawi.

Khawzawl Sub-Hqrs YMA Inkhawmpui Vawi-2na a hmanpui na ah he thu hi sawiin Pu Lalduhawma chuan Mizoram tlawhtu khualzin tam takin Mizoram mawina bakah Zo nun Ze mawi chu an hlut thin a ti a, khualzin hip nan leh dawnsawn nan zo nun ze mawi lantir zel a pawimawh tih sawiin a ti hlawhtling turin mitin an pawimawh tih a sawi.

Pu Lalduhawma chuan ruihhlo do kawnga tan lak thar a pawimawh tih sawiin sawrkarin ngawlvei chhanchhuah kawngah theihtawp a chhuah a ti a, thalaite ruihhlo laka an fihlim theih nan khawtlang nena tanrual a pawimawh tih a sawi bawk.

Khawzawl Sub Hqr huam chhungah hian Group YMA pali, Branch 42 an awm a. Member hi 19,899 an awm mek a ni.



## **I&PR MINISTER**

I&PR Minister Pu B. Lalchhanzova'n mipui tana thuthar dik leh rintlak zawk chhawpchhuah anih theih nan chanchinbumite leh sawrkar thawhhona tha a pawimawh tih a sawi.

Nizan khan I&PR Minister hian thuthar thehdarhtu hrang hrang tan chawhlui a buatsaih a, Minister chuan sawrkar leh Press mite inpawhna tha zawk siam an duh tih sawiin mipui tana thuthar chhawpchhuah kawngah in lungual a pawimawh thu a sawi.

### **Byte of Minister**

Nizana hun hmanah hian I&PR Secretary Pi Betsy Zothanpari Sailo, Director Pi K. Vanlalsangi, AIR Director leh Mizoram Cluster Head Pu DR Lalropuia bakah AIR, DDK leh PIB hotute an tel a, Aizawla thuthar thehdarhtu Firm hrang hrang an tel bawk.



## **CENSUS OPERATION**

Census Operation (House Listing & Housing) 1st Phase 2027 chu zawh fel a ni a, Mizoram district 11 ah April ni 1 atanga April ni 15 chhunga mahni in lum atanga Self-enumeration ti mi 12,655 an awm a ni.

Nimin khan Census Operation Director Vinod P. Kavle chuan Press Conference kovin, Mizoram chhunga House Listing 100-a 100 zawh fel a nih thu a sawi a. Census 2027 1st Phase chu April ni 16 atanga nimin May 15 inkarah field worker, enumerator te chuan in tinah kalin Census hi an kalpui a ni.

Census Operation Director chuan Census 2027 Phase 2 neih hun chu nakkum February thlaa neih a nih a rin thu a sawi a, Phase 2 neih hunah Mizo mipui te tawiamna tha tak an hmuh ngei theih nan thawktute, kohhran leh tlawmngai pawl te tanpuina a ngen nghal bawh a ni.

### **(BYTE)**

Census 2027 Phase 2 neih leh turah hian Mizorama mihring awmzat lakkawm a ni dawn a, hetah hian caste census te, economic census leh thil dang tul te lakkhawm a ni nghal bawh ang.

<><><>

## **UNION MoS VISITS KHAWZAWL**

Union Minister of State for Consumer Affairs, Food & Public Distribution Pi Nimuben Jayantibhai Bambhaniya chuan Sawrkar hmalakna hrang hrang mipuiten a zar an zo theih nan inhrilhhriat tam a pawimawh tih a sawi.

Ni 5 cham tura lo zin Union Minister hian Khawzawl District a National Highway 6 a tlawhna ah NHIDCL hotute chu uluk taka kawng siam leh enkawl hna thawk zel turin a fuih a. KVK Khawzawl a tlawhna ah exhibition stall ama puala an lo buatsaih chu lawmawm a tih thu leh lian tham zawk leh school naupang pawhin an chhim theih tura buatsaih ni thei se tiin thurawn a pe a. KVK hmalakna hrang hrang Tomato, Alu leh Nihawi te tha a tih thu sawiin, an hmalakna hnuai kuthnathawktu mi 5 lain National Award an dawng thei chu lawmawm a tih thu a sawi a. Office leh a chhehvel fai taka an enkawl dan fakawm a ti hle bawh.

Minister chuan Ayushman Bharat Health Infrastructure Mission hnuai sak Integrated Public Health Laboratory (IPHL) a tlawhna ah Damdawiin hmunhma chu thawm that a tul thu a sawi a, Electric Veng Anganwadi Centre leh Khawzawl district chhunga Samagra Siksha hnuai Primary School awmchhun Little Flower Primary School pawh tlawhin school zirtirtu leh naupangte nen an inkawm a, zirlai naupangtenzirna in nuam leh changlung an neih chu a ngai pawimawh tih sawiin naupang himna a ngaih pawimawh thu a sawi bawh.

<><><>

## NCC

NCC Director General Lt.Gen Virendra Vats chuan hmarchhak biala NCC tihchangtlun zel an tum tih sawiin training na hmun din belh zel turin sawrkar nen an indawr tih a sawi.

MINECO-a Gauhati High Court basement-ah nimin khan biakhmuhtheihna kaltlangin NCC Group Headquarters office thar a hawng a, hmarchhak hmarchhak biala NCC tihchangtlun zel an tum tih sawiin training na hmun din belh zel turin sawrkar nen an indawr a ti a, ramchhunga hmarchhak hnam ziarang phochhuah anih theih nan Aizawla NCC office hawn chu a pawimawh tih sawiin NCC kal zel na turah hmasawna a thlen a beisei thu a sawi.

He hunah hian Brig.Gunjit Arora, Group Commander NCC chuan official twitter handle leh Instagram Page a hawng nghal bawkin, NCC chu Mizoram-ah chawinung zel turin hma an la dawn a ti a, NCC Alumni leh Cadet-te chu an thawhrimna leh duty-a an inpekna avangin chawimawina hlan an ni bawk.

<><><>

## COVID-19

Health Department chuan tun hnaia Mizorama Covid 19 hri a darh thar anga sawi chu hlauhthawnawm anih loh thu an sawi.

Tunhnaia Covid 19 hri a darh leh anga thuthang awm chungchangah ningani khan Health Minister, Pi Lalrinpuii hovin Health Department hotuten an sawi ho a, an thutkhawmnaah hian Health Department hotute chuan, ZMCH bikah damlo thawk lama harsatna neite chu Covid 19 hri an kai leh kai loh endik zel a ni a, May thla kal mek chhungin hri kai 53 hmuhchhuah an awm tawh a, hetihrial hian hri kai hmuh chhuah zingah na lutuk an awm lova, heng hri kai hmuh zinga a tam zawk chu Covid 19 hri danna, Vaccine la ve lo, naupang piang hlim atanga kum 1 inkar an ni tlangpui tih an sawi.

Sorkar laipui Ministry of Health and Family Welfare-in Covid 19 chu natna awm ve reng tawh (endemic) anga ngai tur tih nikum lam khan hriattirna tichhuakin, State Sorkar-te hetiang rilru hi pu turin thu a lo rawn tawh a. Mizoramah pawh Covid 19 hri kai hmuh chhuah awm zeuh zeuh mah se, hlauhthawnawm a ni hran lo tih an sawi.

<><><>

## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

## **PM IN UAE**

Prime Minister Narendra Modia chuan Strait of Hormuz-ah him lehtluang taka bungraw phurh tlang a duh thu a sawi. Nimina UAE President Sheikh Mohamed bin Zayed Al Nahyan nen an inkawmnaah he thu hi sawiin Pu Modia chuan West Asia-a muanna awm chu a pawimawh thu sawiin khawvel puma energy dinhmun leh ei leh in hnianghnarna tur pawhin a pawimawh a ti a. Tunhnaia UAE-in beih a tawk chu a dem tih a sawi bawk a ni.

PM Modia hian nimin khan UAE khawpui Abu Dhabi hi thlengin Presidential Airport ah UAE President Zayed Al Nahyan hian a lo hmuak a ni. Pu Modia hian UAE a tlawh hnu hian Netherland panin a chhuak lehngal a. Netherland zawhah hian Sweden, Norway leh Italy a tlawh leh dawn a ni.

<><><>

## **NTA**

CBI chuan NEET-UG 2026 exam paper putrua mawhphurtu bera puh P.V Kulkarni an man. CBI hian ngawrh taka an chhui hnuah Chemistry Lecturer nilai P.V.Kulkarni hi Pune ah an man a ni.

Hetihlai hian National Testing Agency (NTA) chuan NEET-UG-2026 chu June ni 21 ah exam that leh a ni dawn tih a puang. Puan tawh angin tun thla ni 3 a exam lo neih tawh chu paper putrua puhna a awm avangin cancel a ni a. CBI chuan he thil thleng hi a chhui zui mek a ni.

Union Education Minister Dharmendra Pradhan chuan zirlaite chu an ngaih pawimawh ber an nih thu a sawi a. Sarwkar laipui chuan a ngaihven reng tih sawiin exam kalphungah pawh dik leh lai takin an buatsaih ang a ti a. NTA pawhin siamthat a mamawh tih sawiin exam kalphungah hian insiamthatna turin hmalak a ni dawn a ti a. Kumthar atang chuan NEET UG hi Computer Based Test (CBT) hmangin OMR hmanga kalpui a ni ang a ti.

<><><>

## **IRAN FOREIGN MINISTER**

Iran Foreign Minister Abbas Araghchi chuan sipai chakna hmangin Iran buaina chinfelna tur kawng inhawng a awm lo a ti. Nimin khan New Delhi-ah

chanchinbumite kawmin Pu Araghchi chuan Strait of Hormuz-ah bungraw phur lawngten tuang taka an paltlang theih nan Iran chuan pui turin a inhuam a ti a. India in thiltha zawk alo chhuah theih nan India hmalakna chu a thlawp dawn tih a sawi bawka ni.

